

獲嘉縣志卷十三

人物中

忠烈

周

蒼葛楊樊人

後漢書修武有陽樊橫茅田

晉文公朝王王與之楊樊溫原橫茅之田晉於是始啓

南陽楊樊不服隔之蒼葛呼曰德以柔中國刑以威四夷吾不敢服也此誰非王之親姻其俘之也

元

郭明善魁岸驍勇少讀孫吳書慨然有大志嘗曰丈夫當如項籍學萬人敵班超封萬里侯安能效書生尋章摘句從事筆硯間乎順帝元統己亥山千戶從大將某討劉福通有功陞萬戶丁未秋貊高爲變殺衛輝守禦余仁輔駐兵清化時善將兵八千西扼盤城之喉東禦修武之險氣甚銳貊高遂引兵還戊申冬明師由中

灤渡河善力戰歿於陣孫彬收遺骸葬之

明

賀仲軾字景瞻盛瑞子少即嗜學無他好萬歷癸卯舉人庚戌進士初任醴泉令治有聲績以外艱歸服闋補青浦令嚴謝請托不媚上官捐俸新海忠介祠庚申擢刑部主事以父爲繕郎時督營乾清坤寧兩宮力塞漏卮忌者中以考功法冤未伸據實奏辯公論始明癸亥由員外遷福建司郎中時戶部太倉庫失銀主者叅前任湯道衡逮訊公以無據證疏駁之湯得釋出爲鎮江知府時方募運餉黔中者酬以衛印指揮戴天錫先往竣役而衛弁持印不予上官不問仲軾曰如此何以信後將使天下才智之士解體我寧直爲一戴弁地耶上官卒不能奪丹陽姜志禮忤魏璫罷歸一日部劄逮趙冢宰南星而紙尾署姜名院檄下郡提勘仲軾曰姜四品京官非奉旨誰敢擅逮臺司嚴駁仲軾守之不移陞西寧兵備以不媚魏璫爲私人所劾璫級璫誅起山東兵備剔弊刷奸故御史袁化中楊大洪諸公

死瑤禍仲軾爲捐金辦塋尋告歸閉戶著書甲申流氛日逼所在納降公撫膺太  
息欲詣闕陳事死君父前以路梗不能達歸巨栢莊奮筆書齋壁曰人臣大節難  
虧讀書貴有實用吾今得死所矣命姪行素次子振能嗣子敏猷後遂率恭人王  
氏妾李氏張氏王氏相繼死之是日天忽晝晦烈風折屋拔木人皆以爲忠憤之  
氣所感仲軾天性篤實好學力行每教人循天理存良心以聖賢爲法所著有栢  
園論草八卦餘生四書率言春秋歸義等書鄉人爲立廟巨栢村又崇祀大梁書  
院乾隆十五年十二月奉旨崇祀鄉賢祠建坊旌

趙人饒永興屯人咸豐十一年東匪滋擾禦賊殉難奉旨賜世襲雲騎尉襲次完改  
恩騎尉

張天佑南賀莊人武生咸豐時山東長槍會匪擾獲率鄉民驅賊至王井陣亡事聞  
賜世襲守備

張克昌張堤人庠生捻匪擾亂禦賊陣亡襲世襲雲騎尉

趙維新永興屯人貢生同治七年土匪攻永興屯寨維新禦賊殉難奉旨賜世襲雲騎尉

江長元字捷三性剛直有才略中道光十九年武魁二十三年進士欽點御前侍衛署浙江金華協標左營都司處州鎮標左營遊擊咸豐八年戰于玉山大南橋自辰達申斬賊數百以餉不繼師失利矢絕力盡而死土人立廟祀之巡撫上其事詔優卹附祀昭忠祠賜雲騎尉世職

岳鎮西字子藩號鐵生宋岳武穆之裔父諱鈞屢試未售設帳授童蒙書從遊者甚衆公生而穎異性亢爽略小節弱冠爲文憂憂獨造出語驚人光緒甲辰科舉廢肄業高等小學校知縣胡嗣芬校長施子珩俱名士奇之許爲偉器丁未考入汴垣高等巡警學校巡警道蔣懋熙監督梅某志在革命秘密集學生魄力沈雄者數十人演講專制流毒滿漢不平等聲淚俱下鎮西爲感動遂入革命黨籍畢業後委爲修武縣巡警所所長轉道口鎮巡警所所長己酉上海陳其美郵寄青年

會證書及鐵血團團章數百份手鎗數十支爲推倒滿清之舉被軍警查悉乃棄職偕劉積學海廷弼張宗周在汝葉襄鄧一帶運動義舉民國成立與孫秀深羅飛聲等在開封設警華報館及民立報社民國二年袁氏篡國機已露人多緘默鎮西獨直舒偉論預揭袁氏陰謀觸當道忌報館被查封及奔入北京國權報與同人謀倒袁之策鼓吹二次革命又被偵察乃旋里至新鄉縣幾瀕於殆遂復奔走南中追隨李烈鈞陳其美舉兵江西兵敗奉黨內任命回豫聯絡黨員北上密謀再舉機事洩露復亡命上海依蔣懋熙爲第一課課長時蔣爲上海民政長也民三三月奉蔣命赴南京協辦黨務值學界開學生聯合會鎮西登臺演說中有襲莽操故智稱帝稱王誤國誤民之語偵者知爲暗指袁氏乃叱令警士拿獲檻送北京京畿執法處雷振春一再審訊卒以不屈遂被害時三月初八日也

王世文牛屯人清河南陸軍保至五品頂戴藍翎民國十九年充縣第二區保衛團隊長新鄉著匪呂靈聲衛全忠屢擾獲境世文率隊驅逐至小送佛與匪對敵陣

亡

孝友

後漢

張奉河南修武人有孝行子表字公儀遭奉喪後每彈琴惻悽不能成聲

見太平寰宇記

元

耿昌家貧孝養父亡廬墓側寢苦枕塊三年事聞奉勅旌表

李全十歲而孤母即貞婦王氏也母疾篤籲天割股以進及母卒哀毀骨立廬墓三年每日操畚揭高其封可三仞樹以粉楸蔚然成林總管許公以其事聞旌焉

明

張士儒生員小呈社人有至性孝事父母父卒廬墓三年母卒亦如之大巡楮公兩

旌其閭

馮世昌字國升號恕齋正德辛未進士性孝友父疾籲天求代兄弟同居財物由從

兄出入不問因內艱哀毀成疾不起

馮上用環縣教諭孝事繼母辭官不仕學使者嘉其行報部旌表其門

賀仲木字懷麟邑庠增生早失怙事母色養訓諸弟皆入泮兄弟析箸探圖得產稍厚輒用母命推易諸弟年半百孺慕不衰接鄉里仁恕遠近稱之有以贖金數十償所貸者既覺弗怒密呼其人持去曰無使人挾爾也製衣匠袖中盜綾家人索出曰是必欲獻而未暇者其人感愧子行素舉於鄉

清

張可光廩生事母以孝聞母抱夙疾臥床褥光與妻賀竭誠侍左右藥必親嘗歷五十年不倦後遭流寇亂置母華蘿中昇至一棗林母曰我老且疾賊不至命亦應盡兒輩可逃生光曰賊亦人子兒在可俱免不則兒死母可免何敢逃賊稍定移家僑寓衛郡母年九十五終光哀毀骨立廬墓三年謝絕人事潛居共城百泉著書有寄寄廬寄言庸言稗集數卷人見之曰才學如是不謀仕光晒而不言

王奉珽邑增生父早逝母孀居珽有弟二人皆析爨珽獨力奉養及母病藥餌罔懈三年如一日遺產俱讓兩弟以悅母心

王一林貧甚竭力奉事父母有百里負米之風當事者旌其門

常俊傑弟俊彥劉固堤村農也母有疾傑彥即不茹葷晨夕禮佛以禱侍奉湯藥未嘗離左右如是者三年母疾忽瘳人謂孝思所感云

郭柟素性淳朴篤於天倫父顯裔好施予柟曲體親心囊無私蓄居父喪咸中禮節事母張終始誠恪母意稍拂即跪請受責及母亡每歲時省墓必號泣而歸兄隸縣學生後病瘋就醫山左柟徒步相隨又從兄赴江右龍虎山求符水扶掖往返千餘里兩足皴裂友于之篤迄耄弗衰

馮錫采字亮可少孤遵孀母教庚子舉於鄉僅一赴春闈屢奉催選依依膝下不忍離當事以經學儀型旌其閭丁艱服闋奉檄同典楚試志期得士如程英銘范朝綱尤所賞鑑程以一字疵被黜力以元爭不可明年果發解湖北與范相繼成進

士

周克忠年十五而孤事母孝母臥疾年餘克忠未嘗解衣寢方其困憊足爲火熱而不知天性朴誠與人交無欺罔

賀鍾弟銑俱業儒庠生仲輅子父老病在床兄弟侍疾一夜常十數起歷三年無倦容居喪哀毀逾禮鍾先卒遺孤僅數齡銑撫之若己出入庠旋受廩其他行誼皆敦本茂實可爲鄉人式云

郭永譽庠生親病籲天求代遵遺命鬻產建祠立義學訓里中子弟之貧者

賀鳴瑾郡庠生孝思純篤居喪勺水不入口毀頓幾絕或勸之答曰於此而不盡吾情終身抱疚矣兄弟友愛甚篤析產取薄者

李有文傭工養母刲左臂煮湯愈母疾

陶文秀牽車爲業孝事瞽父父疾割股肉和粥以進疾立愈

趙墩亢村人縣學生九歲喪母號泣不欲生母能書見所遺墨蹟輒流涕不已繼母

宋得咯血症醫云脈絕無生機礫憂懼嘗糞以驗吉凶雍正癸卯秋馬營河決水驟至亢村居民走避礫獨慟哭守父柩旁人曰水勢猛迅汝寧不欲生耶礫曰吾父方被淹吾何忍獨居乾處寧死耳水亦尋退得無恙妻張氏克體夫志孝事姑嫜鄉黨交稱其賢

郭宗良字希聖邑生員生而孝友父永謙有聲郡庠與兄同居兄患瘋疾家故貧永謙以一身任門內外事良惻然憂之父歿哀毀逾禮省試屆期將束裝母以大河阻隔不欲良遠離微露愀然狀良默喻母意慨然曰功名身外事耳吾何忍效彼絕裾者哉一意承顏終身不應科舉胞弟宗泗病亡遺腹子鵬程生甫六月弟婦復亡良鞠育如己出稍長擇嚴師課之後鵬程領鄉薦子霖雨亦舉茂才

張司直天性友愛昆弟間從無猜嫌自其祖志達忠厚傳家至司直克承先志數十口之衆聚於一堂誦如也洎司直之孫天爵已歷五世兄弟同居未嘗分析云

劉守身事母孝家貧甘旨必具叔祖母李孀居事之尤虔從弟某貿易於外久絕聞

問守身多方購之歸里比卒遺子二人俱撫之成立嘗買南關鄧姓女爲婢繼訪知其有夫毀券歸之妻陳氏亦著賢聲

郭會融字道明邑庠廩生幼而聰敏即有孝行中年母患癰瘕辭館旋里閉戶事親朝夕不離床前藥必先嘗而後進如此者二十餘年如一日

呂懷玉父早逝母李氏貧不自給懷玉甫九歲鬻於太原王姓爲子比長善操贏服賈於外假道歸省母已七旬寄食壻家哀苦尤甚懷玉痛哭欲留又慮王氏無嗣乃遣子士誠來歸養母母病懷玉偕妻來侍湯藥年餘母卒喪葬盡禮後士誠及孫景福累世登科人以爲孝義之報

張立三字德菴沙窩營人以孝聞

郭永章落紉人遷居大位莊性至孝事繼母猶生母父卒所遺田產悉以腴者讓諸弟兼精岐黃施藥餌全活甚衆子家相中乾隆甲午科舉人

鮑成業孝事繼母每外出必舁妻敬養供甘旨母歿盡哀盡禮兄三人皆早世力爲

營葬存恤寡嫂人稱孝友焉

郭含英落紉人遷居丁村性至孝少聰敏舞勺入庠文品兼優父卒廬墓三年鄉黨稱之乾隆丁酉舉於鄉

朱運昇南王官營人少慷慨以膽畧稱粗涉經史明大義雖不事生產而親友有急難傾囊攸助無吝色咸豐間捻匪擾河朔父與兄均被擄數年無音耗母年六十餘日夜啼哭尋死者數矣公憂甚乃走鄂楚過三江涉皖境歷山東直隸訪問半天下不能得父兄行跡是時足既皴裂囊橐亦空如洗欲歸恐無以慰母不歸又無以圖存進退維谷仰天大呼曰天不欲我父子兄弟相聚乎一日宿野田廟內夢神以藥敷其患處翌日足乃捷甚復由濟南至開州風霜跋涉備嘗艱辛至濮州遙見一人撞面而來定睛視之乃兄也相與抱頭大哭遂得見父同歸故里

郭榮麟郭堤人外柔而內剛捻匪擾縣境公母年八十餘有痿疾兄有膂疾均步履維艱公負母携兄而逃不料賊隊大至公號于衆曰吾所負者吾母所扶者吾兄

欲刃則加吾勿害此有疾人也賊聞而義之曰孝子也與之食而去

孫嵩陽字祝三郡增生性純朴有膽智捻匪擾河朔與弟葵陽華陽均被擄不相聞問越數月君以計自脫及歸家知二弟未返乃復入賊巢縱跡得之偕以歸事親孝父有盃酌之嗜而惜浮費餅壘告罄禁弗再市嵩陽每暗中續增以博其歡其孝友類如此

張獨立號鶴堂初名賀清官莊營人幼聰慧年十七補弟子員旋食廩餼先是父錫琬爲商累南遊于楚手書寄公改名獨立時公方十歲誌其地至是乃負笈尋父跋涉奔馳心力交瘁比至楚父已他適訪詢弗得仰天痛哭忽一老人過而問焉告以故老人曰予故房主也其遺物猶在取之悉償券公將欠外債券另贍一紙以備償還餘悉焚之嘉慶甲子膺歲貢道光丁亥任汝陽訓導以終未見父任滿即歸

陳樹本三位營人家貧爲傭保有至性父卒母師氏悍祖母年八十目失明且有癩

疾師氏惡之屏諸外裸體寄人牛車下樹本備歸見之大痛欲迎養以終天年師氏怒曰吾母子仗十指爲生活安能養此無用人且伊有孫樹明商于共非遠莫能致者汝速致之共勿累我樹本泣訴曰大母已殆迎之家或延餘息致之共則行暴風日中是蹙之死也母堅不允且迫之愈急樹本因無以兩全遂飲毒

賈文淵字道源錫疇長子幼有文名累世孝友偕諸弟恪守家法伯仲之間爭自濯磨在外教讀麥秋還里必先至父所將平日所作詩文呈上所有教授方畧亦必面陳一切父命之退乃退家人之義等於嚴君觀于賈氏殊堪矜式

賀懷恩城內人十歲失怙兄癡弟幼懷恩喪死養生情文備至延師訓弟獨任艱勞母年九十餘懷恩已七旬親病猶侍床蓐親嘗湯藥衣不解帶者數年民國九年蒙大總統賜以孝闕流芳匾額

陳英字子俊陳位庄人幼失怙恃事叔父母色養備至叔父重其才行俾操家政英以勤儉率諸弟以詩書訓諸子以仁慈處戚里晚歲貲產甲一邑而兄弟年皆七

十餘怡怡萃於一堂子侄亦彬彬向文學

李月桂邑庠生父身弱目短視甫成童即慨任家務蓋恐父不勝其煩也父歿事母至孝甘旨無少缺每自外歸必趨母所視安否絮絮語家中事移時始退輒問家人曾侍母側未母喜賙窘乏即善體厥志不吝推解終身行之弗衰

王憲章邑廩生十里舖人遇人有急難仗義疏財無吝色尤善于養親甘旨之供未嘗缺乏母歿喪葬俱遵古禮哀毀異常及兄弟析居慟哭流涕深自苛責時以不得於弟爲憂

劉方謙字牧之清元嗣子繼父經營家事食指衆多商業繁雜恪遵先人舊德或延請名師培養子侄或鈎稽會計裁革糾紛以一身總其成厥惟艱哉年八十餘兄弟一堂萃處讓棗推梨同裘共履怡然歡若童稚邑人以五世一堂顏其庭

李致敬邑庠生月桂子入孝出弟一如其父宗族鄉黨無間言

以德洽輿情表其闕

義行

明

汪仲誠杜村社人正統五年歲饑輸麥助賑事聞賜勅云國家施仁養民爲首爾能出麥一千一十石用助賑濟朕甚嘉之今特賜勅獎諭勞以酒羊旌爲義民仍免本戶雜汎差役尙允蹈忠厚表勵鄉俗用副朝廷褒嘉之意欽哉故勅

郭政三位社人成化間中州大祲詔勸民間殷實戶納糧濟饑許旌表立石政應詔罄所有輸官邑令邢嘉其義禮勞之成化己丑奉旨徵文勒石教諭平水段讓撰文俗謂之萬糧碑

崔樹望高樓營人與王璉同捐貲修明倫堂事詳石刻又嘗施賑貧民郡守義之列名義賑亭碑在府南關外

崔鴻烈邑庠武生中年無嗣以三十金買晉女爲妾甫十五歲抵家察女有愀然狀訊之知許配某姓烈即置別室遣使至晉中招其翁婿至獲白邑令馮抵女父法令出俸錢治粧奩擇吉使結褵烈復備資斧送歸事聞學者以行優名

職耕尹荒歲出貲濟人萬歷四十一年知縣鄧旌其門

郭與權字允中廩生長厚之德感及匪人里有夜行遇賊而借其名以免者賙佃戶馬調急不受所償織席人失錢欲赴井出米贈之不問其名姓子孫化之敦行不怠獲之稱世德者必首郭氏云

清

職化鶴歲貢生與同邑桑秀才奇字善奇字病篤以七歲子豹章爲托奇字故鶴即育豹章於家授以經書長爲納室泊豹章入庠乃遣歸縣令以誼薄雲天額旌之毛現文國學生幼喪父事母以孝聞三世同居一門五十餘口內外無間言性樂分施拯人於厄嘗與都下人李柄同市馬榮澤令某負馬價二百金罷官不能償李失重貲無以治歸裝惶急欲自裁現文計令所負金李應分半遂售已產得百金代令以償而李始得歸

王居敬縣學生無子買封邱康氏女爲妾至家知爲康氏養媳非女也即遣歸又娶